



Georgius Vuendingæ circa Nordlingam ex
Keyferspergiorū familia natus est anno 1519.

Is cum prima literarum fundamenta iecisset, anno ætatis octauo in monasterium Cisterciensium apud Germanos maximū Salem (quod & Salmen-
suiler dicitur) peruenit, atq; pietati & studijs incu-
buit. Monasterium illud uno miliari ab Vberlinga
circa lacum Podmicum, ante quadringentos &
quingenta annos, à Salma honesto uiro ad la-
cum habitate inchoatum erat. is alijs finitimis con-
iunctis ibidem habitare, atque templum proprijs
manibus edificare cœpit. postea sacerdotibus con-
ductis ibidem Deo seruiuerunt, & tandem ipsi laici

existentes omnia sacerdotibus donarunt. Superest adhuc ibi in templo cho-
rus Laicorum à sacerdotum choro separatus. Id cum Gunthramus baro de
Adelsreüten cognouisset, ibidem Benedictinorū monasterium anno 1133 fun-
dauit, atq; Frouinum Lutzellensem monachum primum abbatem constituit,
qui per 28 annos ibidem præfuit. Superuenit postea Eberhardus præsul Sa-
lisburgensis, is eius loci reditus ex suo patrimonio anno 1202 plurimū auxit,
atq; post ibidem (ut & Gunthramus) sepultus quiescit. Vnde factū ut mona-
sterium illud inter ditiora Germaniæ recenseatur.